

La Quotidiana 7-3-2016, p. 5

## Pertge mancan ils medis da chasa?

■ (rtr) La mancanza da medis da chasa è in problem ch'occupa gia dapi onns la Svizra ed oravant tut las regiuns periferas. *Patric Maissen* ha dapi radund dus onns ina atgna pratica da medi a Breil. El è in dals paucs students da medischina ch'è sa decidì da daventar medi da chasa. In motiv per la mancanza da medis da chasa è tenor Maissen ch'i dat memia paucs students da medischina. Er la responsabladad ch'ins surpiglia sco medi da chasa saja savens ina raschun che medis giuvens prefereschian da lavurar en l'ospital. Entant ch'ins stoppia sco medi da chasa prender sulet las decisiuns, sajan ins en l'ospital adina part d'in collectiv, explitgescha il bab da famiglia. «Jau mez hai dentant adina puspè contact cun auters medis da chasa ed er cun ils medis en l'ospital.» In punct da discussiun èn adina puspè las pajas dals medis da chasa. Ils uschenumnads puncts da taxa chantunals per ils medis da chasa na sajan betg ils medems sco per ils spezialists en ospital, declera Maissen. Er pertutgant las vacanzas dettia differenzas tranter medi da chasa e medi en l'ospital: «En quel mument ch'ins fa vacanzas sco medi da chasa gudognan ins nagut. Sco medi en l'ospital han ins dentant vacanzas ch'èn pajadas. Las finanzas duessan dentant betg esser la motivaziun per far la lavur.»

Il pli grond problem èn ord vista dal medi da 37 onns ils temps da lavur: «La preschientscha durant ils servetschs è in punct daco ch'ins ha problems da chattar giuvens medis da chasa.» En l'ospital vegnian ils servetschs partids tranter ils medis. Cura ch'il medi da l'ospital haja liber, haja el propi liber. Er tar ils medis da chasa vegnian ils servetschs partids si. «In medi da chasa ha dentant tuttina insaco l'obligaziun dad esser qua per il pazient. Il pazient spetga gie er ch'el possa tiers il medi da chasa», explitgescha el. Paucs medis hajan da cuvrir blers servetschs. Quai saja il problem che stuess vegnir schlià. En la regiun da servetsch da la Surselva dettia dapi quest onn ina nova purschida. «Ils medis da chasa han a partir da las otg la saira la pussaivladad da colliar lur numer cun quel dal medi en l'ospital.» Quel sappia lura surpigliar ils cas da bagatella. Quai saja in pass per far pli attractiv la clamada dal medi da chasa. In recept encunter la mancanza da medis da chasa ha il medi sez dentant er betg.